

摘藻堂四庫全書薈要

集部

欽定四庫全書薈要

集部

元詩選初集卷三十二

詳校官候選知縣臣吳甸華



欽定四庫全書薈要卷二萬三百九十二

集部

元詩選初集卷三十二 長洲 顧嗣立 編

柳貫待制集



貫字道傳浦江人大德間用察舉為江山教諭遷  
昌國州學正歷國子助教太常博士出為江西儒  
學提舉至正初起翰林待制兼國史院編修官卒  
年七十有三私謚曰文肅道傳甫弱冠受經於仁  
山金履祥既而從鄉先生方鳳粵謝翱括吳思齊

諸前輩游歷考秦漢以來文章之變化是時海內  
為一故國遺老尚有存者師友講究淵源不絕乃  
復裹糧出與紫陽方回南陽仇遠淮陰龔開句章  
戴表元永康胡之純長孺兄弟益咨叩其所未至  
及至京師為吳文正公澄所器賞程文憲公鉅夫  
以墨一丸授之曰文章正印今屬子矣卒為一代  
名宿自號烏蜀山人扁其齋曰靜儉門人宋濂與  
戴良類輯其詩文為四十卷謂如老將統百萬之



兵旗幟鮮明戈甲焜煌而不見有喑鳴叱咤之聲  
臨川危素謂其文雄渾嚴整長於議論而無一語  
襲陳道故元史亦曰沈鬱春容涵肆演迤人多傳  
誦之與同郡黃潛吳萊聲名一時相埒浙東之文  
爭奇競爽涵育甄陶人材輩出迨於明初而極盛  
焉

奉皇姑魯國長公主教題所藏巨然江山行舟  
圖

善畫如攻詩意到即奇警蓋其疎雋姿筆墨無容騁斂  
之縑楮間咫尺萬里景巨然作江山所得盡幽夤冥深  
風雨重曠朗雲霞屏秋光滿帆腹上下天一影白鳥不  
盡飛楓林有維艇稍前牛渚磯却後瞿塘頂豈無乘航  
戒尚想然犀炳巨靈制坤軸割截爾何猛至今氣淋漓  
幅背出光耿人言此非畫與幻本同境然師豈幻者貞  
勝以其靜我來覽遺迹皦若天機秉巫閭東北長岷蜀  
西南永朱邸雪消初春暉浮藻井開圖望神州時節躬

朝請慨思禹功成重喜殷邦靖將鑄嶽牧金明堂安九鼎

袁伯長侍講伯生伯庸二待制同赴北都却還  
夜宿聯句歸以示予次韻效體發三賢一笑

杜詩詫蜀險高有石櫃閣安知居庸口可掠太白脚馬  
行已崇巔鳥度尚層壑林蹊曠迷轍崖井荒留幕俯疑  
日沈車闐若風鼓橐玄雲倏揚旌朱霞粲塗鄣數驛程  
匪賒襲寒更薄客魂逢酒銷鬼膽因詩愕蟠木將為

容胡繩未宜索嚴名戒晨趨澄旻際秋廓紫微晶煥爛  
瀚海氣冥漠腰無兩鞬屬道有五丁鑿弭轡誰所援還  
衡猶屢錯小息樹吟旌爭先厲詞鏘非開石首筵似聽  
郾城柝巨敵無前勅偏師當後却

送郭子昭經歷赴淮東

嚴嚴御史府瑩瑩聚英彥計今玉筍班顯者半郎掾居  
中密告猷治外詳論讞我遊朝士間聞談輒心羨胡為  
三十年負此一破硯子昭每相過開口奇自見弘璧本

不貲况復加藻薦安能辭富貴尚欲志貧賤平明借馬  
出向夕擁書倦去年參元火可賀亦可唁端公坐南牀  
愛士誠矐矐屈君廉訪幕首路走淮甸生平書檄手妙  
在巧裁剗誰無擾獄市勿使滋蔓延平反奉慈母歡喜  
潔羞膳君子既得輿小人將革面想當治曹暇稍稍事  
遊宴試茗蜀井岡看花竹西院古思浩無邊新語時一  
轉定懷京遊舊寄贈比黃絹交情二紀餘此別良繾綣  
往時媚學侶散若風蓬旋今我亦老醜尚復把經卷分

襟各回首絮點雜花片重來都門道迎子十乘傳

文子方寓直翰林數日即以使往雲南典選詩

用識別

聖人御世具黜陟用明幽恒持萬里見若與一室謀滇  
池徼西南疆理亦中州皇明所照燭獷強悉恬柔緬懷  
國利器爵祿迺戈矛稍乖銓鑒宗將貽繭絲憂况提天  
官書往即外府籌考擇命詞臣得無愼其由翰林文夫  
子見謂能言流受詞別知友大斗醕不酬襍被辭夜直

出門戒晨騶選林古所難此事若冥搜豈無甲乙簿珠  
礫同一收施施處士議勞勞城者謳太史制褻貶在子  
用春秋將令周道正遑卹楚人咻循吏果再見斯民庶  
其瘳得結數十輩參錯置邊陲上以昭王度下以振儒  
猷吾徒分阨遠被服在林丘

謝無疑將歸延平留詩為別次韻二首

裘葛亦何事為人司暑寒微哉一封垤欲等嵩華看如  
將射變率未免噎廢餐我貧不自遂早知行路難邂逅

與君別好懷詎能安為語南飛鴻雪迹何時漫

龜山載道南伊闕無全書遜翁受李氏一軌行衆塗如  
人執著蔡於物察鳶魚至今表鄉學粹美不近迂得君  
羈旅中滯念盡刊除譏評世亦有鑒裁我豈虛唯應雙  
劒光賁子幽貞廬

發通州至小直沽

十年鞍馬中釋去理歸櫟江光來娛人似與我意愜疲  
勞省前痛歡喜獲新接念當有行初苟志在懷牒何期



腰間組爵等遂凌躡外雖被寵榮內實懼顛踣以茲戀  
闕情益欲務修業清霜弄晚信老樹見留葉沾河漳潞  
交冰水尚可涉急漿追南鴻直不數旬浹梅花定迎笑  
粲粲光生頰遠遊忘賤貧吾寧負吾鋏

貫草草南歸伯生祕監方晨赴經筵馳詩見別  
舟中次韻俟便答寄兼簡伯庸贊善

講經白虎論載筆承明入此事豈在予鸛鸞正高集乞  
身去江湖幸矣歸期及於何君子心繾繾念朋習新詩

比繡段重贈當珍襲因憐管蒯材分寸強紉緝賴承廷  
鳳輝庶遂谷駒繫皇猷待潤色在治時所急服惟締會  
明基藉臺萊立斯文仗公等別袂不須執

過大野澤

大野自為澤濟流安得通渟涵就深廣蟠際渺西東揭  
帆入洪濶盡此一日風青山若浮髻隱見雲烟中不知  
何鄉聚欲辨已冥濛茲惟開闢來豈固疏鑿功捐小以  
成大地利迺豐崇至今徐兗郊桑麻歲芄芃賄遷擅工

賈組麗連僕僮矧時漕事興舟航密如蓬寶藏在山海  
其益無終窮一令民生遂坐致國本充非吾黃帽郎孰  
訊白鳬翁

雪霽得風徑過高郵

乘舟得順風如鳥新插羽甌湖五十里浪破雪花舞不  
知岸勢迴歛覺帆力舉却望烟中竿參差數家聚高沙  
舊遊處酒賤魚可煮伸眉一笑粲對面九疑阻得非龍  
愛珠逞雋挾雙櫓意令明月胎光燄悶不吐我詩初未

工聊用相媚嫵後朝妙高臺呼雲作吳語

晚渡揚子江未至甘露寺城下潮退閣舟風雨

竟夕

鼓枻凌濤江江光晚來薄相望鐵甕城正值沙水落灘  
長洲渚出月黑風雨作欹眠聽春浪夢枕生新愕起吟  
不成魘但怯體中惡金焦兩浮萍天塹何限著意令制  
溟渤帖帖就疏瀾奈何潮汐舟只尺恨前却方冬百泉  
縮潦淨海為壑乘流俟滿魄明夕異今昨快呼北府酒

煖客慰離索庶因行路難幸識還山樂

贈王玄翰

元貞元二禩我頤未垂髯吳遊一長鋏欲以鈍為銛躋  
攀羣公間跼步限堂廉在我履藉正從渠藩級嚴維時  
許與分金繒不徒兼坐中清觀氏頽身高帽簷傾懷指  
道要恐此後益殲我戇但耳受語味詎能饜謂方偶升  
運豈遂歎中淹寒暑三紀餘往來如痃痞清觀已下地  
白髮我日添徵言駭今見信若龜兆占斯文大圓鏡有

目人得覘奈何復反剝不遺洪入纖竭來豫章城東口  
類遭拊聽談雖亶亶閉息但厭厭道逢美少年進止一  
無嫌揭子為我言其人詳視瞻家微百金產架有羣書  
籤煌煌定武宗緬彼世澤漸清觀我故友有子在窮閭  
技富愈思蓄時來當發潛我為想顏色覆鑑并收奩那  
令毀龜玉不卒舉魚鹽促坐席屢改風回雨飄簾寒廳  
惡草具觴至時一拈旋看養花法賴人加蓋苦雖承天  
澤滋更畏夏光炎又聞日月華西淪則東暹藏景闕陽

曜出幽縣素蟾木功能拯渙地道有流謙育材我豈敢  
贈子以安恬我歌實激烈誰為哲與黔遲歸絮我酒宿  
草爾其霑

危太樸自金溪來訪留館兼旬因歸有贈

數日出恒早旋歸已疲劇思睡方未暝強起臨几席席  
間有佳友來東千里屐所來非健羨亦不畏名迹謂吾  
昔求學頗嘗窺竅卻欲要一夕談以慰百年役寤疑則  
豈敢辨義能亡益斯文千載後泮渙抵離析不有高朗

姿誰完超距力夫道非遠人何嘗繫徵索譬如山出泉  
其初論涓滴渟涵就深廣千流同一派掀掀鼓雲濤帖  
帖輸溟渤是氣中乘陵無吹亦無息文章道之英各亦  
隨所覲草木紛以滋何嘗須粉澤生機一發越形色自  
不隔吾聞古作者嚴嚴垂典式履正有夷途胡行猶墮  
埴韓公起扶衰文字欲適職取新非厭常通變由知易  
衰遲豈復進僕子堅吾僻東風迫歸期未了千日客少  
留慰將遠芳草萋以碧諒哉君子心永言若金錫縣知



筐筥羸不廢秉檠積勉勉他日思為寄東飛翼

歲莫雜言二首

中年鞍馬間所歷萬里途髀肉亦既消夢驚還一呼讀  
史窺古人恨時不能俱寧知遠遊躅足躡雙飛鳬漠北  
松亭塞燕南督亢圖居今采奇迹未覺吾行迂歲晚重  
思之天高明月孤

里中三四友論交嘗莫逆自我遠行邁廿載成乖隔今  
歸僅有存生理各崩迫經時不一晤寐想猶如昔閉門

風霰中何以永今夕不見萬松根  
澱澱養靈魄吾寧獨多壽持遺同懷客

尊經堂詩

并序

昔趙人安先生以布衣教授里中裒輯羣書大備  
經訓使子若孫採擷芳華厭滿膏澤有餘則推之  
以及其鄉之人焉去今五十年尊其書猶尊先生  
即名其堂尊經堂曰此先生之志也太史屬蘇君  
伯修嘗受經於先生之孫最為得安氏之學者乃

來請詩刻寘堂上噫書在安氏而其淑人之功獨  
安氏哉詩曰

聖人言純如載道行萬世貞明配日月廣大侔天地簡  
牘之所資包絡無巨細上而建皇極重覩人文麗下以  
開民彝性初均秉畀訓行宣光熙道否隔氛曠千人萬  
人心揭揭皆經誼此息則彼消剛柔乃殊位進乘休復  
機迪哲蹈仁智自絕其本根奈何取天勦燔滅滋秦瘠  
網羅興漢利存亡書豈知論者常不置濟南耄言出孔

辟發神秘百篇始昭垂五代著成又魯齊韓毛詩其傳  
迭興廢審音以知樂亦各徵四至樂崩名僅存緬想歌  
鐘肆禮失野可求誰明射鄉義制氏記鏗鏘后蒼詳數  
制區區象聲容詎得作者意賴夫春秋家尚識王道貴  
載事或稱誣推凡疑翼偽田何受孔易其全緣卜筮楊  
施孟梁徒別出踵焦費挾書律始除六籍豈俱逝傷哉  
居下流衆惡所犇萃駕言拾灰殘我道猶未墜乘之以  
顓門中復縻識緯黨同護朽竹攻弱擊枯骹文字日荏

滋編策亦鱗比孟荀與揚韓先後參與衛擇精語益詳  
炳炳詔來裔一籥節衆音八風無濫吹方張乃遂翕已  
矣更五季大明升殿郊熒奎屬炎彗春陵南標正陝洛  
黃離繼經世偶潛虛象圖合而異舉隅豈無反僅若小  
星眊眊紫陽翁數責了羣眊在時張呂間建學特超  
詣一鼓行無旁八區同教肄矧茲龍德中美化純漸被  
家書動盈屋人事各康濟恭惟罔極恩聖哲布嘉惠經  
尊道則尊有合嚴度寘覆之以堂庭牖戶亦崇邃古史

洎今詮珠駢而玉綴高名以經斟酌原知水味譬如登  
喬嶽岡阜左右睇草木流華滋烟雲撒纖翳觀生老其  
間面背俱盡睟豈惟一身謀直作數世計是家離石宗  
遭亂藁城寄劬書自玉峯菑播實深概子孫刈其熟穰  
穰收秉穗後來及門士妙合若龜契尊聞行所知況復  
躬自致過逢詫師資忍負築場志我願安氏堂廣作天  
下治矜式表國都弦歌行黨術蓄誠以端蒙達生以知  
類惇典敘彝倫三郊而五禘與世開隆平吾經固無累

自微可之顯道豈不在器世間有形物輾轉資弊弊遊  
談亦何根閣束祗自棄是將比鎮寶前人所數遺手澤  
尚鮮新一展一流涕晝誦夕思之上帝儼臨莅作詩諗  
蘇子孫曾戒無替

旦發漁浦夕宿大浪灘上

張帆得順風飛鴻與爭疾後浪蹙亦舒前山過如失桐  
江轉數灣上瀨未入日篙工享安便坐穩頭屢櫛人生  
倚造物理微難究詰處順安可常離憂詎能必白鷗知

此情故向波間沒

龍門

一溪瓜蔓流渡者云可亂屢涉途已窮前臨波始漫嚴  
嚴龍門峽石破兩崖半沙浪深尺餘灣洄觸垠岸它山  
或澍雨湍漲輒廉悍頃刻漂車輪羈絡不能絆其源想  
非遠衆水自茲濫濟淺抑何艱慮盈疑及患峰陰轉亭  
午出險馬蹄散草路且勿驅烟開望前館

望李陵臺



平沙北流水青山在其上李陵思鄉臺駐馬一西向草  
根含餘淒峰尖入寒望俚言雖莫稽陳迹尚可訪想其  
深入初步卒亦材壯手張天子威氣奪名王帳覆車陷  
囚虜此志迺大妄一為情愛牽遑恤身名喪縷縷中郎  
書挽使同跌踢安知臣節恭之死不易諒河梁執別處  
出語謾惆悵家聲故燁赫三世漢飛將兵法有死生人  
運迭休旺忠回在信史豈沒功罪狀馬遷當腐刑強欲  
雪其謗土思豈能無層雲塞亭障千年麒麟圖吾將執

玄覽

晚泊貴溪遊象山昭真觀

舟行弋陽道山石多異狀嵌空露鍾竅屹立儼珪鬯沿  
洄百數里璆鐵森相向最奇象巖下仙館占丹嶂舍櫂  
遵微行松篁插雲上開門看青壁左右挾高閤飛雨灑  
面來輕飈入簷颺道人出迎客牖戶坐南嚮延登昇仙  
臺境肅神滋王不知日車側但覺天宇曠我生名山遊  
正費屐幾兩采真喜初遇戀勝期屢訪布帆催夕舉未

敢恨飄蕩水深彭蠡湖兩眸更東望

送劉叔讜赴潮州韓山山長

揭陽海陬郡谿谷藏霧毒賈區乃在城積居跨南服凡  
今仕者往喜氣溢僮僕非輕萬里途蓋善千金蓄子行  
攜束書言就韓山讀韓山祀昌黎有酒有肴款騎麟想  
來過盼盼攬遺躅汎除蠻風清沾漑時雨足以茲為教  
首如日升若木何必鰲避溪已有雞應卜今人慕古人  
未免傷抑促儒官實閒散歲廩七十斛飽飯取詩哦雲

月與追逐寧無趙子徒彈琴和予筑是將實裝橐果勝  
美梁肉毋羞宦轍卑所志三年穀子其厚韓山聽我歌  
獨漉我歌儻無證併訊兩黃鵠

渡河宿麻子港口

青山彭蠡尾湖水始生岸一舸破微瀾風帆用其半亂  
流二百里午發至未盱蒼茫洲景中明滅津煙畔數家  
小聚落漁竈倚灘爨舊聞萑符間弱肉飽強悍時平道  
路清跋涉得無患豈非年穀豐禮義能服叛嚴嚴主湖

神牲酒滿杯案乞靈我豈敢雲黑檣烏散櫓師促轉柁  
軋軋鳴鶯鶴前瞻麻子洲波面明星爛新別重有懷縣  
情如此粲

題蘇長公書曹侍中與王省副論趙元昊事

古人善觀人其孚如眊龜後是數十年理事可逆推何  
嘗爽分寸自足制盈虧夏童昔跳踉勢將撼邊陲生子  
實不令貌求惟有幾虎欲既逐逐狐行亦綏綏於時曹  
侍中中山擁旌麾相逢輶軒使王駸貳三司謂言國若

鼎寘安母易危人才出試可邊患稔愆違消釁必思豫  
恃吾有足支西樞本兵地舉網振其維遲當屬之子在  
子究所施駸雖踐樞筦夏強適斯時謀弱遂弗振斥去  
乃其宜億言不幸中國豈終莫醫坡翁忠義人聞之為  
愕眙寫置尺紙中示作垂世規流傳百年後引貫珠累  
纍清夜一發楮光晶射南箕我觀與衆異慨今誰致之  
自古泰治世守道在四夸濫觴起毫芒流末誠渺瀰猗  
那久不作國蹙祚已移展卷懷所欽淒風振庭枝

十六夜望月蝕陰雨不見

三五秋正中既望月當蝕公庭修救事  
縱金控鳴鐃喧拏走兒穉發召徧巫覡我時適未寢披衣步簷隙飛雨灑面來空雲稍如冪天應愛厥妃恐懼遭掩抑仗此豐隆威角彼妖墓力譬諸藪藏疾含穢惟汝德兩曜駕兩輪安行各適職奈何啖食凶須臾成毀壁見過雖有懲匿瑕乃無迹雨非黨墓者為天護精魄常情惜良夜良夜安足惜德刑與陰陽配對初不逆星辰繫天步磨螳

沿歷歷圓顙示無為蒼蒼垂正色稽首父母光千人萬人覲

宗忠簡公畫像為公外曾孫葉深道作

近古社稷臣生世常不數不能半五百繼見已超卓炎  
運昔中否兵氛纏大角掩旆薄日黃張弧北風惡起公  
滏陽節仗以障河朔懇懇存趙忠憤極涕橫落扶義亟  
西征敵愾為小却佐興靈武功受任留官鑰主辱臣則  
何國勢滋以削回鑾累十疏言諄聽殊貌一死不貸公



百壬吁可忤企公如列星宵光仰昭灼幾葉外曾孫傳  
世春秋學手圖起予觀言自崇勲閣士雅雖則休隨會  
尚堪作蹙國今更非雲飛天一握誰能挽江漢為公洗  
河洛

望會稽山

城東鑑湖道水光翻夕鷗雲破青羅靡稽峰芝掌浮悠  
然動予矚玉女開明眸固知穴可探却恐書難求蒲蓮  
浩如海微風挾輕舟前山與後嶺導從森幢旒誰張北

斗旗漸進東瀛洲桂枝儻堪折衰白媿重游

送馬伯庸御史出使河隴

河隴隴坻天西僻御史嚴行八十驛風驚大鹵幕初乾  
雪重穹廬寒未釋入關先見父老喜出節始通氓隸逆  
鯨鯢既戮海為清蜂蠆雖微尾含螫急宣聖德慰荒遐  
盡洗民瘼轉疲劇當今至尊御疆宇坐朝法宮受圖籍  
暉暉陽曜燭天垠殷殷春雷行地脈周公方宏治外規  
汲黯豈負居中責固謂真儒識邊瑣徑煩拂士迂朝蹟

可能高戴觸邪冠不使橫飛征蜀檄君行萬里從此始  
人生百年俱有役副藏待子馬遷書重贈慚余繞朝策  
歸與空腹貯崑崙從此南風談禹畫

六月十五日大雨雹行

是日月食

日月相鬪鶉火中晡時欲息雲埋空雨脚初來雜鳴雹  
雷驅電挾聲淪淪排簷倒檻揮霍入犀兵快馬難為雄  
中休頗意絕崩迸轉橫更覺加鈇鋒亂拋荆玉抵飛鵲  
恣擲桃核隨飄風坐移向壁防碎首急卷巾席何怱怱

上天號令豈輕出摧殘長養皆元功陰凝陽爍鬼神著  
氣有至反誠則同想茲試手鼓萬物特欲振槁昭羣蒙  
齋心變貌謹天戒嗚呼生意無終窮

寒食日出訪客始見杏花歸而有賦

京華塵土春如夢寒食清明花事動偶賒佔畢數日間  
似釋頰肩百金重今晨訪客出城東馬上風來亂吹墮  
穠桃靚李杳然空山杏一梢紅聳聳浮暉滿樹豈饒春  
麗色迎人太矜寵后皇賦命幾何偏早秀遲榮徒倥傯

嬌姿不並歲寒看殘香祇作籬根擁物情如此乃自嗤  
一官坐得三年冗烏騰兔走苦相催老矣鬢絲今種種  
紫鳳憐渠短褐穿白鷗負我歸心勇故園梨雪想繽紛  
月下樽誰獨捧涓滴長令酌顙蓬何用百家營守冢  
寄聲為謝歌泥中補兀吾猶完趾踵

出北城獨上秋屏閣望西山烟靄中漠無所見  
北江負城沙似磧帖岸微行誰所闢折旋殆類蟻沿封  
漫漶猶如龍印迹風髮披披鞍兀兀去馬浮曦正相逆

入門平步得高層身與危闌爭幾尺緇袍年少不嗔來  
拂掠胡牀趣敷席鈎簾意擬見西山雲亦何心故蒙羃  
我疑玉女畏迎將且懼詞鋒恣彈射豹藏惜此管中斑  
黛點羞渠眉上碧不然洪崖仙者過霧縠烟靨羅什百  
詎容左右覲昌丰祇許依微攬芳澤我時坐定深得之  
大小往來成一易青天白日豈嘗無好懷轉眼難尋繹  
祝融開面索新詩五老破顏愁惡劇我持一影行萬里  
負舟而來山有力褰華寧俟九春期繫匏未了三年客

正須慰藉管城公重此提攜煩脫幘

為蔣英仲作顏輝畫青山夜行圖歌

前山溼霧方濡濡後山蒸雲如鬼驅松蹊行盡迫曛黑  
壁月正挂寒蟾蜍問翁蒼茫何所途投館莫有林間廬  
枯梢尚鳴風勢急隈岸欲渡溪流麤沃州天姥雖峭絕  
無此原壑深盤紆固應豐城牛斗墟龍劒夜出乘飛符  
神人仗氣挾以俱虎豹旁躑雄牙須世間何物珊瑚株  
不可褻翫矧可誣青峰之巔野水阻獨往似是仙者徒

心融意定不少假收攬奇怪一筆模蔣君閒朝攜過予  
墨色照几晴光鋪老顏未老為此圖柳子歌罷三嗚呼  
南州雙壁范與虞君當請賦傾明珠

三月十日觀南安趙使君所藏書畫古器物

三月浹旬新雨餘市河一舸如浮苴言尋佳客趙橫浦  
步入城隅門巷紆褰簾迎揖坐便坐深炷爐熏呼茗盃  
硯屏方截紫綺段楚瑤秀列珊瑚株是家素號虹月舫  
載畫盈簾書盈車客逢好事要審鑒便肯解褚傾囊儲



相看貴德亦貴物古玉錯落排筵敷鹿盧帶鉤環珮玦  
鞞鞞昔將承屬鏤佩章六紐四官印篆畫刻深銅質麤  
配之衝牙奉君子貫以繫璫聯金魚連錢驄馬琢文玉  
圉人立側垂裙裾神工定復煩剗剗赤刀故想來銀鋸  
次陳鼎器論製作商周秦漢焉可誣玄武實水卣實醴  
腹背翠錯提梁朱最奇劒槩尺有咫綠玉龜鱗純體膚  
精銅歲久剛性在間閱燥溼其無渝銓量畫品差甲乙  
錦標玉軸隨伸舒庭光古佛出梵相滿月在水蓮生趺

盧前吳後筆鋒勁履豨承蜩玄化俱瑤池仙會上中卷  
細巧自是吳元瑜雲霞樓觀遞隱見花竹羽毛工染濡  
絳旌飄轉紫簫發步輦導從千瓊姝終篇八駿惜既闕  
詩亡可補此置諸意夫鬼物拚疵吝免彼耄荒留歎吁  
徐熙葩葉妙設色塵昏蠹蝕猶鮮腴古綃一段寫秋意  
芙蓉鷗鷺連茭蘆夢載鷗夷浮浩渺此興初不緣蓴鱸  
七客張萱為誰作濃墨大筆色不枯五人人跨一善馬  
一跨烏犍一蹇驢印窠慘澹悅生字豈曾籍入官中帑

穰穰畫苑姑撥棄伸眉更請評法書二王真迹胡可得  
硬黃數幅真唐摹蘭亭五字損不損肥本瘦本斑斑殊  
如人身口耳目具神采乃在頰上鬚虎賁舉樽雖甚似  
優孟抵掌何其疎世間楮墨日弊弊欲駕跛鼈行天衢  
南唐常侍六書學凌轢斯邈開榛蕪雜詩流麗滿一卷  
銅甬篆法無能踰金繩鐵紐莽回互山虬海蜃爭騰驅  
嗟予欲讀屢拊口形求意索且須臾泰山繼起石鼓後  
李監捷出張先弧向微二徐為啓籥此道湮滅誰昭蘇

真書生行行生草飛白籀隸同一樞張顛草聖入三昧  
小楷妙合褚與虞郎官石記毀已久百金可有墨本無  
世之珍物豈待贊題記况復經鮮于綺園角夏四神坐  
刻字寸許無葩萼永平元舅紀功頌燕然何在搨墨烏  
厓鐫野刻百數種傳觀一二日已晡餘歡未盡謀再至  
榜人催發吾歸歟莫投蕭寺微雨作昏燈照影溜鳴渠  
冥懷且復領其要回向灼觀心地初百年蓬累大宇宙  
蕩搖不啻風中旛寓意於物形勿著尤物亦能為我娛

滯形小足致偷奪大或控頤傷口珠牛李相傾坐石禍  
王涯複壁嘻其愚吾徒適目取一快彼豪巧者方睢盱  
唏予嗜古與君並見獵時然思負嵎作詩紀載實颺縷  
若遇匠手當刊除同觀六士梁越產王楊三子甘陳余  
交游聚散等萍絮春風渺渺吹江湖徵詩如見所見者  
後有畫者傳之圖

與用章戴生同度淡竹嶺夜宿山家

一溪屢涉溪流淺廿里窮源臨絕巘雲間仄徑細如縈

霜後枯蓼齊若翦沙崩石爛阻危攀磴斷崖縣還斗轉  
已驚汗袂泣餘滋更擬班荆息微喘未昏斜照白波淪  
直下遙空青霧卷粵初川嶽各流形自是陰陽始昭辨  
誰開壑谷通片雲重為封圻制鉤鍵神工使解鑿崔嵬  
世路何庸增連蹇舍車未免役孱軀揶揄聊將攻勝踐  
枌榆連蔭壯且衰嫻友關情行孰遣吾生已付一浮漚  
此足寧堪幾重趼莫投山館睡麴麴雨撼窗扉燈明曉  
寒雞呼夢報詩成曠懷直為朋知展

載酒堂詩并序

蘭溪州同知州事彭侯震卿為南寧軍判官日嘗  
訪得蘇文忠公載酒堂遺址築室肖像即修祠事  
朝野名勝往往形之賦詠予知侯有懷賢尚德之  
心則夫宜人之政是不一書而已作載酒堂詩詞  
曰

東坡先生如龍鸞世人疑其欲飛蟠九州四海不容足  
攝身徑去窺髦鬣南荒萬里儋耳國帝遣海若開奇觀

潛淵挾得睡驪目思山夢見峨眉彎颶風惡浪吁可駭  
土芋脫粟纔供餐黎家兄弟好事者小酒初熟生微瀾  
艸童迎路吹蔥葉門東刺竹西牛闌扶攜歸去常半醉  
流落生存重一歡四黎善善君子類若比張蔡猶蕭蘭  
天乎木鐸何望爾蠅之附驥渠非難誰尋雪迹到鴻爪  
正用載酒標堂顏百年文獻隨草莽庭階蕪沒井且眚  
風流別駕彭夫子未負進賢頭上冠是心尚德甚飢渴  
挈取舊物還祠官書銘小摘枕榔綠薦俎時羞荔子丹



海邦夸俗雜鼃黽茲事信為風化端音聲固有合琴瑟  
嗜好果豈殊鹹酸竭來蘭陰語吾故緇衣三詠三長歎  
咄哉愷悌神所勞雲路矯首看扶搏

題高尚書藤紙畫雲林煙嶂圖

髯翁昔飲西湖淥滿意看山看不足醉拈官紙寫秋光  
割截五州雲一幅吾聞妙畫能通仙此紙度可支千年  
祇愁蓬萊失左股六鼇戴之飛上天

過閘行

二漳合下如奔矢絕出為河容匯水南橋北柁越埭來  
後挽前抽爭一跬懋遷物品實王畿嶽貢方輸千百累  
商功已覺十分贏趨利真成三倍市聖人乘運智者謀  
尚憶當年河事始向非廟算屈羣策安得舟航若平履  
天開地闢幾何年禹迹芒芒大疆理毋將本榦貳強弱  
所務有無通遠邇日高捷聞放三版津人絕器舟銜尾  
河渠使者水衡丞走馬西來呼起起

松雪老人臨王晉卿烟江疊嶂圖歌

君不見帝堦王家寶繪堂山川發墨開洪荒重江疊嶂  
詩作畫東坡留題雲錦光又不見後身松雪齋中叟伸  
紙臨摹筆鋒走樓臺縹緲出林坳蘆葦蕭蕭藏澤藪白  
雲飛不盡青冥百丈牽江入樊口墨花照几射我眸我  
為搴芳歌遠游胷中是物有元氣世上何所無滄洲我  
疑此叟猶未化瞬息御氣行九州五山四溟一觴豆瑣  
細弗遺囊楮收故能援毫發天藻不與俗工爭醜好楚  
山雲歸楚水流萬里秋光如電掃拈來闕董散花禪別

出曹劉斲輪巧披圖我作如是觀毛穎陶泓共聞道嗚  
呼相馬亦相人駑駘豈得同翔麟舍夫毛骨論形似如  
此鑒賞焉能真後來有問延祐脚意索舉似吾方歎

題瀛州仙會圖

巨鼇驪首戴三山海波不驚坤軸安方壺員嶠彼何境  
靈氣布濩非人間金銀觀闕勢如翥攢林珠樹垂珊珊  
棖題竦擢明河畔閣道橫截浮雲端仙人來往羽衛備  
或駕紫鳳駟青鸞霓裳法曲舞初破執樂瓊姬神采閒

時容下界攬鄉澤却對連峰愁髻鬟茅龍飛去杳無迹  
烏駝兔走雙跳丸蓬萊舟近風引却却歎靈蹤難重攀  
是誰模寫枕前夢欲用鐫鑿區中頑神仙固多狡獪事  
世儒論著存不刪賈生賦鵬語夫道後有達者當大觀  
忽然為人化異物斯理幾何堪控搏仇池洞穴通小有  
神清玉宇標孱顏彼皆因境示生悟直啓真源湔垢癥  
嗟余質薄迫世隘輕舉便擬凌飛翰披圖愴怳縱玄覽  
託乘浮游窺九關無窮八極冀一遇返道遂與松喬班

登年閱世要自致何必辛苦成金丹

題王宰所藏墨龍

飛廉為御豐隆車憑陵九淵傾尾間誰與發墨啓玄奧  
神光躡斗旋其樞湖邊竹屋清夜徂防有沒人來摘珠

商學士畫雲壑招提歌

并序

諸生伊埒布哈嘗從其父官洛下強學好修得於  
山水之助者也集賢侍讀學士商公見而器之為  
畫雲壑招提以贈乞予作歌公此圖意韻閒遠生

能求之筆墨之外將不由是而有發乎

高為巔峰下為壑羣木慘慘風欲作浮紅動翠何許似  
別崦殘雲明佛閣眼中疑此洛南山只尺便到龍門灣  
暗潮已落洲渚出新月未上漁樵還商侯曾有羣玉府  
借酒時時一軒露延春閣下墨淋漓餘情亦及滄洲趣  
好山好水如高人豈祇貌敬將心親平生幾夢奉先寺  
不知猿鳥猶相嗔君不見飲酒吟詩狂太白曾是匡山  
讀書客泥塗失脚走憧憧歲晚看雲情脈脈生今益壯

業益修未可造次思巖幽披圖漬墨歌遠遊我無桓玄  
寒具油

僧傳古踴霧出波龍圖歌

葉公好龍致真龍精氣所感無不通僧中劉累有傳古  
夜夢捷入驪龍宮陽暉焰焰陰魄動左右給侍皆魚蟲  
探珠不得逢彼怒轟然鼓鬣興雷風潛窺竊識領其妙  
寫之萬楮將無同目睛數月纔一點波浪咫尺如層空  
乘雲執鏡麾電母跨海獻寶招河宗劉嘗善篆古善畫



得意忘象象乃工為龍為畫了不識有頃喫水投長虹  
龍乎龍乎德正中超忽變化天為功絳官帝子秉節從  
九淵喚起赤鯁公永奠鼇極開鴻濛

同楊仲禮和袁集賢上都詩十首

出塞行瞻日趨朝喜近天離宮開苑囿馳道絕風烟瑤  
水巡非遠峒山歷更縣甘泉多法從獻賦憶當年  
雨水漸衣黑雲砂際目黃烟開纔黯慘日出已蒼涼徇  
俗高簷帽清心小篆香端居萬里念蕙草惜微芳

昔建寰中業初開徼外山雉城平兀兀沙水淨灣灣朱  
夏宸游正清秋武衛閑叨陪文學乘空媿鬢毛斑  
謠俗隨方異溝塗隔舍迷醺人惟馬漣勸客有駝蹄殿  
角孤花靚城隅雜樹低天涯中夜舞如意昔曾攜

天潢猶白白雲幕故青青積潦摧車軸高風墮箭翎宮  
塗丹赭堊殿戶紫金釘女樂蓬萊祕哀簫動杳冥  
幄殿層雲障轅門積雪峰奇鷹皆戴角御馬盡飛龍瀚  
海將臨幸云亭望陟封青丘大羽獵有事待玄冬

曹務唯章句官規自法程齋扉侵雨潤宴几得風清歷  
歷三刀夢行行萬里城明年遂耕隱深仗酒為名  
經游還絕塞際遇復清朝大暑無蒙綸輕寒已御貂盤  
空齏屢薦觴至酒頻澆貧病諳為客何慚帶減腰

公子青絲轡王孫綠幘車宴酣風小定舞破日西斜手  
擲宮中果神行海上查築郿母自厚儉德不期奢

水草方方善弓弧戶戶便合圍連婦女從戍到曾玄雪  
毳千家帳冰瓢百眼泉浚稽山更北長望斗光懸

送李文晦僉事易節燕南二首

北候催乘傳東人挽去轅不觀滄海小安識太行尊好  
爵隨年進初心與道存老儒當劇部煩護國西門

鵬鶚三秋擊騏驎萬里行官聯漢直指經術魯諸生世  
或深求法公惟不近名天心與民監上下一昭明

送朱本初法師赴豫章玉隆宮

鎖蛟惟有柱墮鼠已無家想到真仙宅能回俗士車露  
壇春翦柏雲日夜敲茶人境今雙絕長吟採物華

初夏齋中雜題三首

壤隔溪流斷門依野次成初非慵應接自是寡將迎  
筍蕨搜山得鹽醯入市營貧居薄滋味盤膾敢求精  
經月始一出移時還小勞生涯依馬磨力作問蠶繰藤  
刺青陰密楸花紫豔高雨晴看爛熳草徑莫令藉  
池岸方如截池波深可汨出門歌小海見客思滄洲魚  
沫吹還息蛛絲斷忽抽萬生同一馬敢望絕轅軸  
聞臨江范德機以母喪哀毀而卒

服斬誰非子摧形不有身使能穿壙入果勝闕泉親突  
兀留文冢淒涼卷釣緡夜臺開幕府還借筆如神

二月七日與陳新甫甘允從飲范使君亭

心賞他年屢湖光此處全春生鷗鳥外人醉杏花前細  
竹侵除道殘陽滿繫船毋將比西子吾實媿華顛

睡餘偶題二首

此世何多幸予生厚自憐簡書方厲禁裘葛屢催年正  
是穉能熟其如橘不遷摧藏南郭隱放浪北窗眠

惜此珊瑚玦栖之薜荔牀青山圍坐密白日放歌長客  
久違朝籍人誰問夕郎駕車容一駟何必更留良

題離騷九歌圖

紫貝東皇席青霓北斗旗究觀神保意遑恤放臣悲有  
客傳芭舞何人執籥吹楚巫千載恨憑向畫中窺

贈別宋季任赴甘肅提舉二十韻

寧塞洮河外甘州瀚海隅羌髻通別譯封域界中區氓  
俗風丕變王靈德誕敷粵初聯吏治近亦好文儒左學

將興蜀西庠昉自虞懷章煩遠役鞭馬戒前驅驛路爭  
迎傳闕門不用繻水經張掖弱山對賀蘭孤禹鑿班班  
迹函詩往往圖發時梅未萼上日草應芻元宰親加豆  
諸生肅詠雩職司雖翰墨佩服已銀朱會覩天荒破端  
令士氣麤槎明星是客鄉大酒為徒請播言斯在居夸  
聖豈誣高才每流蕩平世匪崎嶇只作三年夢須輕萬  
里途旃廬春襲襲笳管曉鳴鳴漿灩葡萄盃斟寒翡翠  
鑪新篇多慰意許可寄潛夫



故相東平忠獻王挽歌詞

龍尾乘參會麒麟踵畫圖記功宜顯顯論世匪區區肇  
敏公維似明徵聖有謨陟庸纔秉軸運化亟旋樞物已  
歸坯治人將就楷模開誠登衆正獻可破羣諛夫里同  
耕鑿民儀異唯俞景鐘陳備樂浮鼓節投壺尹德湯能  
協堯勳益載都方期扶日轂必使麗天衢大角兵端起  
清宮禍變殊霜簣飄荏菽風幹落椅梧影射無鮫鰐磨  
牙甚豹貙淒涼朱鷺曲狼籍玉麟符立事思常武成書

恨毫姑攀髯應共載升屋竟誰呼厚地難藏烈凝陰為  
蓄痛血留衣上碧吟失口中珠遘閔遺多難摧凶激萬  
夫義娥還麗景彗孛掃夷途狂孽憑三窟神威覆五湖  
不煩公府牘終見藁街誅濁散陽明勝精垂晦魄蘇君  
門重肅穆賢路豈荒蕪殉死身寧贖觀兵眼未枯春秋  
如有作盜賊敢稱孤灞上仍堅壁驪山罷論徒董狐千  
載後丹筆詎應無

東平王拜珠丞相安童孫也輔英宗為賢相至治三年奸黨特克實等有

南坡之變拜珠死之

送南竺澄講主校經後却還杭州

鹿苑開鴻妙龍宮閟象玄間闕來幾譯披發露雙詮梵  
學傳皆正華文潤乃全義深含窈眇道廣極淵泉論自  
諸師造言因半偈宣何曾離性相間亦示機權述鈔心  
同悟分科緒各牽函盛方秩秩棗剝益縣縣剗剗寧無  
舛研磨或更偏遂令迷亥豕不復辨夔蛟佛耀昌齡啓  
皇明正晝懸五城銀色界三殿寶花筵重見弘經日如  
逢出震年詔徵皆宿德御講盡真筌此士孤山隱前身

華頂眠野雲生靜慧江月湛空圓天上青猊座人間白  
馬羈微君能引重於世孰昭先晦魄風簾燭頑陰雪屋  
氈聲將為律呂眼豈混朱鉛疑句多多證蕪辭一一鐫  
法珠終照秉宗鏡已當銓煥爛金泥字牽聯玉簡編指  
河符聖歷穿石畢僧緣竣事纔敷奏疏榮亟勞還萬回  
袍錦麗大覺鉢孟鮮尚食來珍供司農輟禁錢龐恩流  
濺濺鷁影去翩翩昨夢寧非蝶遲歸誤信鵲望京猶綠  
樹入寺始紅蓮雨外排千耦烟中聽兩舷屨盈南竺戶

櫂集北湖船巖觀應增聳川容若載蠲應求隨燥涇鑽  
仰喻高堅夏懺朝朝禮秋燈夜夜然固知融至理直可  
寄單傳客袂難為別朝簪未放捐愛閒思結社食力待  
治田苦笑昌黎慙深懷惠遠賢獻花憑一詠安有筆如  
椽

次韻答鄉友吳立夫見寄之作感別懷歸情在  
其中矣

宇宙方來事江湖獨往人扶搖遺短翮濡沫到窮鱗誤

作軒裳夢終慚稻錦身迹雖侔燥涇學豈混疵醇跼步  
逢多躋虛懷待一振屈伸乘卦氣消息候天均喜際三  
雍啓還依六籍親馬羈從幸日螢案潔餐辰滕口虞官  
謗稽謀信卜陳踐更非顯陟遷秩遂為真清廟方惇禮  
容臺忝末塵卑卑論燕雀憲憲望麒麟緬想閒居賦猶  
存弟子紳國鄉誰尚友輿皂或稱臣飛翰因來客分光  
肯照鄰之人芻有束何物稼盈囷矍圃初登射驪山適  
罷巡王全遭刖足淵靜得藏珍接席連芳晝看花惜好

春言筌開窈窕理窟至馴馴蓄思文俱銳修名實與賓  
逝將熙孔業由此樂顏仁淹泊思同社羈孤若異倫宜  
休寧俟斥漸老最憂貧夙願惟耕釣浮榮謝鼎茵滅行  
無聽漏觀涉即知津狐首求吾正螽斯詠爾詵粉榆應  
不改蘿薦重相因惜遠接青菊期歸睇綠蘋題詩緘恨  
去離緒極紛綸

大雪戲咏

霰集先驚密雲垂陡覺低穿帷纔巧入擁砌已深迷蟾

影宵翻鵲屏光晝駭雞投虛知井幕蒙險失巖梯九地  
藏膏澤千門委壁圭黃輿增厚載玄武蟄幽栖忽灑聲  
尤急中休氣轉淒辨方惟有服封谷不須泥稍喜夷塗  
闢多憂陷穽擠世將還樸素壤盡徹青黎固欲殊廉角  
於何畫町畦溟池涵上下灤岸渺東西縞舉仙人袂窗  
明玉女閨混淪收日脚軒豁露坤倪翦毳巾成氎吹灰  
室覆緹妖氛隨蕩析闌茸謝槌提勁竹猶遭挫疎梅恰  
吐齊若為散鱗甲無已戮鯨鯢曉日消遲見豐年卜可



稽漁歸袞襖兒戲象狻猊正苦貧衣綻那禁凍面顰  
曉罌初撥醴午椀更吹齏幾夢斟羔唱徒聞索飯啼掩  
闕誰掃軌返棹却尋溪踐迹嗔鴻爪全生媿馬蹄莫抽  
梁苑思爭效漢襟題

今體詩六十韻贈錢正傳之官池陽述學言懷  
見乎辭矣

昔有推鄉學今誰侮聖言尚辭淪曲藝執業謝專門製  
錦何妨美更刀實太煩爰從王氏作重喜魯經存集註

初刊定傳疑并討論七篇賢所訓一貫道攸根翼傳茲  
猶準希蹤孰可捫仁巖頤剝建木泮齋沍或者傷麟  
趾嘻其狀虎賁走雖名惡子君豈負諸孫直想披吾與  
毋徒闖彼藩律元求秒忽車用飾輪轅堂陞尊卑分淵  
泉左右源緩行惟視履妙契必亨屯固謂炊將熟終期  
溺是援蟾梯榮峻陟鵬路藹孤騫正取能充拓何嘗志  
飽溫銀章凌霧雨朱紱賁丘園負弩方前導乘車且載  
奔威行秋浦曲象動歲星垣入署梅花曉開筵草色暄

琴聲春寂寂簾影晝掀掀建德當時國清溪何處邨再  
畚宜黍稌庶植間蘭蓀明府今為政窮閭自不冤使民  
安蜡臘戒吏絕壺飧可得防鳧兔常須苙放豚馬驚連  
軸折魚淦尺波渾警靜山無盜年登社有膳雞窠對翁  
穉肉譜繫仍昆拊已心惟小趨風禮更繁加籩薦庭實  
斂板候戎軒勿枉中懷璧寧甘右屬鞬因游問花柳須  
暇采蘋蘩客夢西堂句賓筵北海尊神應歆豈弟世豈  
混昭昏穩躡飛鳧舄徐升畫鹿輶胷中五色線天上九


重閣補袞功誠著觀書眼未睂葆光非匿景絕利不離  
源有客愚溪柳其人太學蕃方時征橐吉自信括囊坤  
化瑟遲當改樵枰看屢翻先機輕絳灌未患稔晁爰此  
豈猶堪出子將矢勿諼采芳留晚節曝背負朝暾獨幸  
聯衣袂頻容漬酒痕親仁情正切惜遠思如燔薄贈將  
吳紵佳占獻楚燭瞻雲渺江漢掬月在瓶盆生色滋融  
盞清光與吐吞各持修省事永慰別離魂列辟無前績  
先師罔極恩名山嚴泰華大器屬璵璠法古承三統書

年表一元榮枯徵斷簡消息候微萱避弋齊縹鳳懲羹  
忌染黿讒夫行似蛾君子化為猿計熟非稊稗維豐俟  
芭糜短篇牆及仞企望倚崑崙




元詩選初集卷三十二

謹案第二十八頁後六行伊埒布哈舊作淵魯不  
花今改 三十四頁後八行拜珠舊作拜住特  
克實舊作鐵失今改後倣此







總校官候補中書臣吳紹潔

校對官編修臣馬啟泰

謄錄監生臣孫大森

欽定四庫全書薈要

集部

元詩選初集卷三十三



詳校官候選知縣臣吳甸華

欽定四庫全書薈要卷二萬三百九十三

集部

元詩選初集卷三十三 長洲 顧嗣立 編

柳貫待制集下

次韻伯庸無題四首

東來不隔江青瑤刻作寶華幢  
龍翰別致三千匹

翠羽生輸四十雙  
天上神閒雷下斧  
人間客醉月縈窗  
崧南半截雲虹色  
宜著韓家小石淙

珠斗闌干動夜光  
霏霏神雨酒痕香  
故時徒服多為赭

今日祠衣獨尚黃梁苑且延能賦客漢廷安用戲車郎  
琴中莫置拘幽恨聖德宣昭到越裳

欲覓麻姑看海潮徑從織女問河橋著莖宿露龜方息  
竹實垂雲鳳已遙白璧何資三寸舌黃金偏戀十圍腰  
新來代地聞歌曲盡擲秦聲入管簫

黃鵠將騫兩翅垂跂行幾許似蛇醫栖遲社首修封日  
太息甘泉獻賦時風籟蕭蕭聽漸起星弧歷歷看初移  
塵埃渴肺今年甚絕想仙盤露一卮

送李士弘侍讀攝祠王屋

河山肺腑樹靈峰泰乙高居象帝容  
蒼玉登壇親藻籍黃金塗檢盛函封  
林光忽與升烟合雲氣初乘委珮重  
歸格神休奉明主恩流偏覺侍臣濃

觀錫喇鄂爾多御宴回

毳幕承空柱繡楣綵繩亙地掣文霓  
辰旂忽動祠光下甲帳徐開殿影齊  
芍藥名花圍簇坐蒲萄法酒拆封泥  
御前賜酺千官醉恩覺中天雨露低

車駕駐蹕即賜近臣咱馬奶子御筵

設壇殿錫喇鄂爾多深廣可容  
數千人上京五月芍藥始花

還次桓州

塞雨初乾草未霜穹廬秋色滿沙場  
割鮮俎上薦黃鼠  
獻獲腰間懸白狼別部烏桓知幾族  
他山稽落是何方  
長雲西北天如水想見旌旗瀚海光

次伯長待制韻送王繼學修撰馬伯庸應奉  
從上京二首

仗前捫酒進瓊脂翠絡金鉤向馬垂  
少宰羶廬初張事

從官魚笏正書思三辰上應旂旂象六樂中陳鼓吹詞  
供奉逍遙承御宿故應燕許擅同時

山圍黑谷翠漫漫獨許詞臣息馬看蹕道雲開朝采正  
蹕林風定雪華乾賦成特賜麒麟芻宴出初擎碼碯盤  
歲歲八州人望幸鉤陳旗尾認朱竿

太子受冊禮成赴西內朝賀退歸書事

樂舞充庭見象箭重瞳日月麗璇霄雙龍承檢纔升冊  
九虎開闕恰御朝內殿皆陳朱鬣馬左璫新換紫金貂

青袍最困微班忝親向前星挹斗杓

午日雪後行錫巴爾圖道中有懷同館諸公

尖峰猶是漠南山駝褐蕭蕭午日寒艾葉漫將頭上插  
榴花應許夢中看馬前砂雪行初隱鵬背荒雲落更盤  
王事獨賢吾敢憚重煩同館勸加餐

漫題齋壁

牧馬新來秣地椒街頭酒玉傾瓢羲和白日經天近  
敕勒陰山度幕遙雨過忽然思御袂風清聊復快凌歊



他年續作灤陽夢萬里排雲溯沅寥

送王正臣經歷赴浙東

仙掌浮空紫翠重金華秀出浙河東繡衣幕府雲霄上  
丹筆刑書雨露中溪釀獨稱雙醞美津船纔許一帆通  
送君因寄思鄉夢為問青山舊桂叢

送楊君祥赴定海稅官因思舊遊

麾手黃塵一解頤翩翩行色有光輝豚魚稅足初成算  
鷗鳥心閒已息機山翠入簾消宿酒海氛吹雨落秋衣

舊游更在雲濤外獨倚西風送鴈飛

送葉道士歸天台

北斗光中曳翠旗五城樓觀極巍巍采山不鑄黃金鼎  
佩印空垂白羽衣石井劒花飛夜氣玉田芝草豔春暉  
天台仙子應招隱萬壑梯飈看鶴歸

次韻伯庸待制上京寓直書事四首因以為寄  
舉頭涼影動明河問信仙人八月槎斗下孤光懸太白  
雲間長御挾纖阿霓裳催按新聲遍鳳藻需承曲宴多

一代詞華歸篆刻龍文還欲映琬戈

松翠新栽似鶴翎手中雲影落深青  
宮花忽動紅千帳  
禁柳齊分綠半櫺金掌擎秋調玉屑  
銅渾窺夜約銀釘  
不知太史朝來奏東壁光聯第幾星

烏桓落日稍沈西南極青山女堞低  
馬谷夏泉經雨漲  
龍堆秋草拂雲齊一畝祠檢將升玉  
萬里九封不用泥  
倬直夜涼談往事乘車猶欲避雞棲

杯面春風黯黯波醉來難覓百東坡  
寧無天上支機石

信有人間采玉河  
霜驛舊圖開  
党項雪毫新興寫  
伽陀  
聚星更比荀陳盛  
月照金鑾夜若何

送鄉僧偉師南還

析木光中佛耀開  
丹樓碧閣映崔嵬  
空聞白馬馱經去  
幾見黃龍聽法來  
笠影翩翩翻雲作  
蓋錫痕依約浪生苔  
歸山說似京華夢  
親到幽州禮塔回

舟中睡起

影入船窗隙  
日升霜袞驚  
夢却青綾一  
官朝右寧非客

十月漳濱幸未冰江驛比來無鴈帛水鄉隨處有魚罾  
食貧黽勉紫微祿消得山靈笑負丞

登徐州城上黃樓北望河流作

高樓背水壓奔衝影動雲虹落水中土色從黃宜制勝  
河聲觸險聽分洪却思沈璧千年日欲問乘槎八月風  
汴泗交流平似席南行北播本同功

雪中渡淮

水入長淮浦漱分櫓前圻岸覺奔沄灑篷雨歇纔聞雪

吹帽風來不見雲何處能忘丹鳳闕此身將混白鷗羣  
有人問我蟻珠顆直遡寒光到海濱

鎮江逢袁子方明府

京國同遊兩毳袍歲闌歸路各維艘淒風催合南河凍  
寒色看成朔野高紫蟹著糟新點茱黃魚剝酢滿流膏  
丹陽物品渾宜酒試遣霜威敵醉豪

閱進士卷賦呈同院諸公

五緯明明一鑑昏斯文吾已媿專門直教漢法稱無害

猶恐秦人議少恩  
審樂豈能遺律品  
采芳終擬得蘭蓀  
胷中故有青藜焰  
夢裏從渠墨水渾

過鐵峰書臺觀其所得宋咸淳中大宗正訓名牒上有福園署押感而為賦

姬姜顛顚况同盟  
屬籍淒涼舊訓名  
寶玦懸腰非少日  
金環探樹是前生  
分無藜杖過天祿  
尚有花書記冢卿  
未必後來能識此  
祇教人說漢西京

立春日陪左平章飲散懷舊偶題

江上迎春春日稀跨鞍真似早朝歸  
飲釐夢惜紅螺小  
霑賜心驚綵燕飛  
沐罷為誰慚鏡鑷  
宴回容我從旌旗  
東風若也勤披拂  
莫遣寒梅一點飛

初夏憶京城鄰舍

石家院裏葡萄酒  
荆媪池邊芍藥廳  
倦劇擁書終日坐  
醉來支枕片時醒  
主人並直飛龍衛  
鄰客誰開放鶴亭  
萬里滄江雲一去  
欲將孤影寄伶仃

送張明德使君赴南恩州



幾許炎州畫裏山西風驅向馬前看詩人舊志三刀喜  
邊候新乘一障安時取椰漿斟玉液饒將桂蠹薦雕盤  
雪花定比常年大燕寢香凝夜氣寒

追餞常大參至樵舍鎮飲別後夜宿舟中聽雨  
七十里江沙水黃沿流送客舉離觴回舟并載別愁重  
殘雨微生半夜涼欲與仙人騎竹杖時從老子據胡牀  
懸情獨有南樓月白兔河邊正擣霜

端午日泊舟信州城下陳行之推官袁仲野知

事攜酒饌勞予于挹翠亭上

信州城南江水流故人惜別暫維舟  
節中偶病不成飲客裏逢歡却是愁  
地迮那容胡旋舞波回更作楚聲謳  
三年三見戎葵色多事紅花照白頭

浦陽十詠

仙華巖雪

縣北有仙華巖翠掌浮空雪景尤奇

冰柱浮空曉色蒙海波搖動玉玲瓏  
九清內景游紛外五嶽真形太素中  
微月升壇初映鶴長雲連野不驚鴻

仙姬宴坐瑤池上，催捧蟠桃獻木公。

白石湫雲

白石龍湫在縣東南，能出雲為雨。

白石靈山望贊皇湫潭，此復見蒼蒼。飄揚直欲陵三際，  
膚寸猶能雨八荒。空外金精縣太白，泉中虬彩化長黃。  
傳芭奏罷神絃曲，松蓋成陰澤氣涼。

恒州贊皇縣有白石靈山漢碑在焉。

龍峰孤墪

縣東龍峰古墪，實為蒼龍左角。

兩環日月似飛梭，鰲背稜稜窄堵坡。朱鳥前頭森巖巖，  
蒼龍左角見嵯峨。玉函舍利朝光現，珠斗闌干午影過。

浩劫浮雲開萬象寶華雜還散芬陀

寶掌冷泉

寶掌山唐千歲和尚道場有看經得道洞巖竇出泉極甘寒

一勺曹谿未是甘刺山容易出飛泉消融太古岷峨雪  
澄映中秋沆瀣天挂樹青猿窺洗鉢眠沙白鹿伴安禪  
巖龕無縫身如石逆數高僧入定年

月泉春誦

縣西有泉隨月盈虧泉上精舍祠文公成公

有盈有泚即寒泉猶隔蘆峰道里千嶽麓雲深藏策處  
匡山人老讀書年松楠疊影青浮几華樹生香晚入筵

稽首堂中兩夫子六經言遠視如天

潮溪夜漁

去縣五十里溪流始大有魚蟹之產

溪水添流到石砭  
小家殘戶占漁商  
蛟龍未解乘雲氣  
魚鼈安能避澤梁  
兩岸櫟林藏曲折  
一篝松火照微茫  
淮夸固有蟻珠顆  
往往鈎深得夜光

南江夕照

南江橋西望原麓返照如畫圖中

千峰不盡夕陽孤  
斂翠浮丹入畫圖  
塢廟傍連山影直  
石梁中互水痕枯  
白魚在汕將踰尺  
紅稻登場稍似珠

玉露金風秋最爽  
跳身何用市間壺

東嶺秋陰

縣東東山嶺平林  
廣野秋常多陰

半里官橋出市闌  
一團秋色破孱顏  
雲開浩蕩初疑曙  
日出蒼涼不見山  
斷鴈殘鴻飛杳杳  
綠蕪紅葉映斑斑  
去年菊蘂今年發  
拾得籬邊句子還

深禡江源

浦陽江原出深禡  
山在縣西三十里

濫觴初不滿  
瓶盆百谷渾渾一  
壑吞自此安流輸  
渤解  
放渠高浪蹴崑崙  
出山未適帆檣便  
竭澤毋庸網罟繁

謝客題詩曾宿處孤雲落日是何邨

昭靈仙迹

昔黃帝少女于仙華巖上升山下有昭靈廟水旱禱之輒應

芝掌中開顯氣青雲駟雙駕鳳凰翎因山不啓軒轅鼎  
化石猶聯婺女星磴道芳春琪樹長巖扉清晝碧華零  
真仙帝遣司風雨喚起淵龍聽指令

垂虹亭晚眺

山光自獻一螺青人立垂虹酒乍醒兩界星河涵倒景  
千家樓閣載浮萍欹檣側柁衝風勁密網疎罾刮浪腥

正為鱸魚忘世味隨方吾亦具簞簞

次韻魯參政觀潮

怒濤卷雪過樟亭人立西風酒旆青日轂行天淪左界  
地機激水出東溟倒排山嶽窮千變闔闢雲雷竦百靈  
望海樓頭追勝賞坐中賓客弁如星

夜行溪谷間梅花迎路香影離離可愛

暝投邨徑繞羊腸離立江梅似鴈行冷蘂微開初的皪  
繁枝亂插更淒涼蒼烟挂樹多疑夢淡月窺林稍覺香



正為先生行役苦故留紉玉薦奚囊

中秋待月不見却懷魯子翬學士時留城

婺女城頭柝亂鳴二更起坐聽江聲為渠滿月當圓景  
奈此浮雲點太清蓬鬢羞明寒燼落桂花養魄嫩寒生  
去年官燭風簾夜對酒人今在玉京

寒食山居

歲月無情日變遷惜春留得酒家錢梨花小雨驚寒食  
楊柳東風似去年志士屬當躬井臼善人誰為表原田

老來撫節偏多感何必雲安有杜鵑

遊五洩山四首

神斧誰開鑿澗磻拓開地險出天慳  
湫潭隱奧龍非畜  
木石陰森鬼所寰劫火塵空遺井臼  
枯禪骨冷墮榛菅  
如何大法臨標季不放摩尼照此山

中巖不與亂峰羣翠氣橫飄截瘴氛  
龍象淒涼如欲泣  
馬駒蹴踏竟無聞濃嵐散落崖間雨  
洩水流來石上雲  
人說早年呼蜥蜴投符起蟄有靈文

青天吹墮玉芙蓉日出烟開彩翠重  
婺女名山今入越  
泐潭弟子別為宗  
於何勝境偏多阻  
如此衰年始一逢  
照影龍泓余種種  
欲從老衲借枝筇

橫鉤纔通一徑脩  
方山湧翠似騰虬  
五湫地壓三州勝  
八十僧從七客游  
赤日行空垂倒影  
青天坼罅拔飛流

大烹慚負詩人腹  
賴有梅花肯障羞

山界杭婺越三州境本隸婺割入越

暨馬祖弟子靈默棲禪之地  
故為應乾禪院  
今榜三學院  
叢林法社銷落盡矣  
五湫神龍所居  
歲旱迎湫水乞

靈多應者

初霽望金華山雪

沍陰巖谷變晶熒凍裂仙家月石屏雲影渾淪涵太素  
天光搖曳到空青波心雙捧金人劒霞際橫驅玉女輶  
皓鶴不來詩夢破鮮飈吹袂酒初醒

會稽懷古

湖波皎鏡浸青蘋潮落西陵渡口春地下珠襦誰拾塊  
人間玉椀久成塵夾舟蛟劒神先化培鼎龍文字既泯  
留得冬青啼杜宇并分淚血染湘筠

過賈相故第

賈再貶循州團練副使死漳南

恨滿龍驤江上舟可容副使老循州高冠誰上麒麟閣  
斷礎猶名燕子樓洛下啼鵲慚相業遼東歸鶴詫仙遊  
異時不藉公田策安得吳杭駕海流

晨度居庸至南關門

雲梯忽斷山峻平霽霧初褰林嶺明兩都扼喉南北鎮  
九州通道東西行矗崖巨石擎佛屋壁門遺築開軍城  
當時苦詫天下險一卒前臨強萬兵

八月十七夜半後看月

錢塘城東潮海西四更月上寒淒淒太陰垂精金氣感  
列宿藏景珠繩低鐘鼓沈沈尚傳警羽毛謾謾屢驚栖  
蟾蜍初不隔風雨誰其翼我凌丹梯

自宗正府西移居尚食局後雜書二首

都城一住十年餘挈挈今朝更徙居奴輩莫嫌家具少  
篋中猶是借來書

未明車馬省門開面面風霜一寸埃借得小窻容我懶

五更高枕聽春雷

灤水秋風詞三首

朔方竇憲留屯處上郡蒙恬統治年  
今日隨龍看雲氣  
八荒同宇正熙然

朶樓清曉常祠罷  
吾殿新秋曲宴回  
御帛功由寒女出  
分頒恩自九天來

西風初吹白海水  
落日正見黑山雲  
旃廬小泊成部署  
沙馬野駝連數羣

後灤水秋風詞三首

界牆窪尾砂如雪灤河背頭風捲空  
泰和未必全盛日  
幾驛雲州避暑宮

旋卷木皮斟醴酪半籠羔帽敵風砂  
丈夫射獵婦當御  
水旱肥甘行處家

山郵納客供次舍土屋迎寒催瑾藏  
砂頭蔴姑一寸厚  
雨過牛童提滿筐

題立仗馬圖



玉立彤墀氣尚麤  
食殘芻豆更何須  
太平未必閒無用  
一幅君王納諫圖

題宋徽宗扇面

瑤池池上萬芙蓉  
孔雀聽經水殿虛  
扇影已隨鸞鳥去  
輕紈留得瘦金書

題宋徽宗獻壽桃圖

青鳥銜書昨夜來  
蟠桃如斗核如杯  
蓬萊殿上三千壽  
不及春風夢已回

題金顯宗墨竹

海潤星輝大定年生綃筆筆寫蒼烟若為夢裏簞簞谷  
直到洋州雪笈邊

題睡貓圖

花陰閒卧小於菟堂上氍毹錦繡鋪放下珠簾春不管  
隔籠鸚鵡喚狸奴

題折枝海棠圖

東風庭院紫棉香翠碧飛來午影長啼溼紅妝看不厭

祇疑春色在昭陽

荊門

河塘底裏通涵管宣泄隄防計未迂大抵成功搖末議  
却將失得較錙銖

張子仁為都水監丞日作涵管疏泄積潦一時以為便而今或有非之者

洪州歌六首

豫章城西江上舟船翁夾柁起紅樓官鹽法名有饒乏  
市利商功無算籌

舊坊馬齒誤驚眠新水魚來聽賣鮮詫說閒曹無一事

閤前小吏送餐錢

東湖水滿葑雲開掠取烟光雨色來未放官絲興畚鍤  
且從魚樂占池臺

菱蒿鮮滑勝雞蘇滿尺河豚玉作膚漫說江鄉美庖傳  
幾曾風味似蓴鱸

女兒頭戴角冠欹勾葉垂垂顰鬢齊十里來城肩擔重  
新晴菜把賤如泥

舊聞雙井團茶美近愛麻姑乳酒香不到洪都領佳絕

吟詩真負九迴腸

次韻奉答德機冬日見寄

雪滿千山雲滿溪  
半竿寒日稍平西  
東風不為年芳地  
錯莫江梅吐未齊

題壽皇御題淳熙宮畫牡丹扇面二首

劒南樵客寫花容  
院畫流傳號國工  
春壓玉闌江雨歇  
綵鸞驚夢又成空

天香國豔豈堪描  
生色誰將上尺綃  
留得當時宮墨在

杜鵑啼處雨蕭蕭

行界牌源道次小憩民舍

小谷疎林受數家年芳猶有刺桐花  
白雲不為青山地截斷前峰兩髻丫

送文郎中赴交趾

天子龍飛統萬邦玉符封檢下殊方  
遠人盡是雕題關奉使惟應粉署郎  
翡翠飛時銅柱溼鷓鴣啼處石門荒  
炎風苦雨煩珍重萋萋葉檳榔取次嘗

此詩見體要中風雅元音俱作薛玄

卿

送臨川謝有源赴閩醫提領

一路青山荔子叢  
華山西望粵臺東  
家風蘭玉庭階上  
官事參苓藥籠中  
鷁首去乘潮浪白  
螭房催出酒波紅  
福州自是炎蒸少  
臘雪飛花落半空

過長城

道德藩墉億萬年  
長城漫與朔雲連  
秦人骨肉皆為土  
漢地封疆已罷邊  
飲馬窟深泉動脈  
牧羝沙煖草生烟

神京近在玄溟北九域開荒際幅員

李老谷聞子規

老杜聞子規近在東西川猶云感時物收淚寫幽悵今  
我行寒徼子規相後先時夏雲景晦鳥呼搖空烟響入  
樹窅窅啼垂血濺濺想知岐路難不惜軀命全千聲復  
萬聲喚我歸言遄苟非木石心豈免腸內煎江南叢薄  
間有花名杜鵑開時是鳥至相戒治春田不歸如江水  
負此今五年風土孰云異物情要有遷寄巢勿浪出祝



爾還自憐嚴程趣行邁且復揮吾鞭

欽定四庫全書

卷三十三

歐陽玄圭齋集

玄字原功宋執政文忠公同族遷于潭州之瀏陽  
生十歲有黃冠者見之曰是兒神氣凝遠目光射  
人當以文章冠世延祐乙卯以鄉貢首薦登進士  
第除同知平江州事調蕪湖武岡二縣尹召為國  
子博士遷翰林待制天厯初授藝文少監纂修經  
世大典至正初以學士告歸詔修宋遼金三史起  
為總裁官拜翰林學士承旨屢乞休不允竟以中

原道梗卒于大都寓舍年八十五時至正十七年也贈大司徒柱國楚國公諡曰文初虞文靖公為國子助教其父井齋先生教授于潭見原功文大驚手封一帙寄文靖曰他日當與汝並駕齊驅由是文靖薦之于朝聲譽赫然相埒卒如井齋言原功歷官四十餘年三任成均而兩為祭酒六入翰林而三拜承旨屢主文衡兩知貢舉及讀卷官當四海混一文物方盛凡宗廟朝廷雄文大冊播

告萬方制誥多出其手金縢上尊之賜殆無虛歲  
海內名山大川釋老之宮王公貴人墓隧之石得  
其文辭以為榮片言隻字流傳人間皆知寶重宋  
景濂序圭齋集云公之文自擢第以來多至一百  
餘冊藏瀏陽里第盡燬于兵此則在燕所錄自辛  
卯至丁酉七年間所作耳然則當元季之亂名公  
鉅卿之文其厄于兵燹而不得傳者又可勝道哉  
舟次諸牘寄詩奉謝都水分監瑞卿監丞

抱疴辭承明買舟滬官牖袞襟正無忪篷底可容納舳  
艫尾相銜密次若鱗甲憶初離神京餘暑尚揮箠淹留  
近秋杪朝爽欲添袂紆傳進元策走介奉一札使君適  
分監羸縮制有法得書即欣然愛我踰素狎遣騶護輕  
舟快若歷三峽鄉心鷹脫鞴野性兕出柙昔憂阻穀澠  
今喜泛苔雪黃蘆間蒲稗綠藻唼鳬鴨舒懷對幽景寓  
目成畫夾公堂為展席觴客禮意洽病予難却酒亦復  
飲盈呷吁嗟逆旅途知己元不乏相期遠大器留詩當

盟歆感篆辭則長欲賦慚韻狹

送振先宗文歸祖庭

歐公孫子多擘派以為四莫年歸潁陰非無首丘志乞  
洪不得請由是懈歸計攷公生平言亦頗憾先世先世  
多才賢生適逢五季幅員政分裂盡瘁于所事竟乏垂  
世名蓋亦限地勢况復公少孤坎壈蜀漢裔身當混一  
秋代逢承平際擇里審所安實邇輦轂地子孫託畿內  
宦轍亦云易人情曷免爾公豈溺聲利詎知返簞移南

北尋睽異一枝先南邁司造有深意沙溪標德里瀧岡  
重塋祭至今青原家十世祀不替振先吾宗英守正恥  
骭骹閭閻保家法處約不少懟嘉樹無由枝嘉穀無滯  
穗原本既不凡時需諒無棄矧今掄俊髦往往論根器  
老夫辭冊府多病久憔悴徒懷薦士心言莫士軒輊賦  
詩當推轂自愧辭已費憧憧青雲友誰如古人誼歐陽公晚  
年乞守洪州累表不得請於是歸江右之志遂不果余  
詩所謂其居偏方熟於歐文者能知之蓋公之不歸廬  
陵其志深有可諒者矣南渡以後宋人多議公此事洪  
景廬楊廷秀之賢亦未免有此意甚者謂公子孫居潁



為金人所戕而遂絕是大不然近年奉詔修三史一日  
於翰林故府中攜金人遺書得元遺山裕之手寫壬辰  
雜編一帙中言安平都尉完顏錫勒漢名鼎字國器嘗  
鎮商州偶搜伏於竹林中得歐公子孫甚多以歐公之  
故并其族屬鄉里三千餘人悉縱遣之則知未嘗殲于  
金兵也此好事者為之辭明矣元遺山金士領袖生平  
極重歐公嘗有詩云九原如可作吾願從歐陽北人  
至今佩服其言振先歸以似鄉先生桂隱劉公一觀

為所性姪題小景三首

林廬澹疎烟歸帆泊沙渚披圖得空闊總是經行處  
寒屋茅簷古疎煙野樹春遙遙濟川者應是此中人  
浦口歸帆落沙頭行客回林間酒旗出快著一篙來

試院唱和二首

仁皇下詔急求賢  
糠粃當時偶在前  
兩榜復科新大比  
三人聯事舊同年  
關山道路尋常夢  
臺閣風雲尺五天  
但使得材今勝昔  
吾儕寧復歎華顛

進講金華集衆賢  
禮闈御命拜君前  
花摧蠟炬同清夜  
餅餤紅綾憶昔年  
龍尾步隨黃閣老  
鵠頭書下紫微天

南宮羣彥時相問  
何似官街有米顛

仁宗皇慶甲寅始  
詔開科順帝元統

三年議罷至正辛巳復行時停科已七年矣圭齋詩又  
云至正羣興郡國賢威儀重見甲寅前杏園花發當三

月桂苑香銷又七年  
其歲月俱可考也

至正壬午十一月十三日祭初祖墓早仰更秘  
書適有佳句見勞恩恩奉酬嚴押二首

白髮甘泉忝從官歸來曳履上吟壇故山虎豹多文采  
白水蛟螭有屈蟠謁客及門容屢滿贄文盈篋借燈看  
百年省墓償初志心憶先親痛苦剜

青春萬木一根荑一一春工妙剪裁顧我乞歸懷潁水  
羨君訪隱到天台題橋肯學相如志誓墓慚無逸少才

但喜陽剛時彙進明朝緹室動葭灰

主齋于宗族之誼往往三致意焉又

有和春洲古律云儒家冬至祭初祖客子異鄉來遠支末句云無由作吏守墳墓願訪故山耘紫芝可與前二

詩參看

### 早秋聽秋居士園池

碧池流水綠潺潺高下樓臺紫翠間  
阮籍才華勝南族謝安清致滿東山  
標名花塢鷺爭道集句桃符鹿守闕  
灑掃園丁今白髮秋翁化鶴幾時還

### 竹澗圖

青林翠巘俯江郊，谷口湍流巨石坳。  
戛玉萬竿鳴水樂，垂紳雙瀑盪雲旂。  
風漪靜浸蒼龍影，月瀨光搖紫鳳巢。  
歌罷商巖採芝曲，兩翁翰墨定神交。

壺清

朝飲層冰淪性靈，夕餐秋露引脩齡。  
江湖大瓠中無物，海嶠方壺外有情。  
貌示神巫機闔醉，邀市掾酒芳馨。  
何人欲作先生傳，長憶寒菹月滿庭。

過洞庭

白沙隱隱見金鰲殿閣憑虛結構牢天水渾融浮太極  
神人幽顯隔秋毫龍堂深閤靈棲冷象緯低垂客枕高  
欲作廟堂迎送曲杜蘅碧盡離騷

夜宿寺前農家

漢南旅店已星稀倦宿田家帶落暉蕭寺依山聊復爾  
鄴侯送酒是邪非風餐并覺涼生飯露坐俄驚月在衣  
老子漫遊吾漫送登山臨水憺忘歸

昌山

昌山峽口日西斜蘭渚維舟近酒家水漱樹根龍露爪  
石排江岸虎交牙路迴佛寺藏深塢風動漁舟掃落花  
再拜靈均獻蘋藻月明環珮下汀沙

賜經筵官酒次蘇伯修韻

鼇極天初補娥池月已修鮮飈生廣厦清旭映垂旒玉  
漏聰無壅重瞳視不流凝神思燕翼虛已納鴻猷章撤  
金鑪地筵收玉斚浮甘泉歸步遠太液便程優鸚鵡棲  
宮樹鵲避客舟商耆爰漢幣瀛僞膳唐羞名輩應相

語明時豈易酬徘徊西掖晚雁影度延秋

泰定丁卯八月十二日崇天門傳臚賜進士右  
榜第一人阿恰齊左榜第一人李黼皆肄業國  
學日新齋余西廳授業生也是日京尹備鼓樂  
旗幟麾蓋甚都導二狀元入學謝師拜余明倫  
堂榜眼劉思誠探花郎徐容嘗因同年黃晉卿  
彭幼元從予遊亦拜其側其餘進士以門生禮  
來拜謝雜還不記姓名園橋門而觀者萬計都



人以為斯文盛事昔未有也同寅舉酒相屬偶  
成四絕以紀其事 錄二

禁院層層桃李開天街繡轂轉晴雷銀袍飛蓋人爭看  
兩兩龍頭入學來

淡墨題名二十年一官獨自擁寒氊居然國子先生館  
三五魁躔拜座前

天歷庚午會試院中馬伯庸尚書楊廷鎮司業  
及玄皆乙卯榜進士偶成絕句紀其事出院明

日有敕督修經世大典又成小詩寄諸弟

錄六

省垣東畔至公堂十五年前戰藝場飽食大官無補報  
兩科來此校文章

御史承差鎖院門侍臣傳詔出天閣試官被命聯鑣至  
同榜三人出謝恩

聖主宮中遊幸疎日臨祕閣玩芸儲昨朝蘭省纔開試  
清曉玉音催著書

別駕祠前雪水渾弟兄沙上舉離尊三年不洗來時褐

要看淋漓別酒痕

香山山頭新月彎  
一似家里看西山  
去家五十度弦望  
圓璧何時照我還

仁廟初科射策郎  
如今斑白立朝行  
東風昨夜聞歸雁  
夢繞江南烟水長

題所貴姪梅

老樹縱橫出幾條  
一枝還又亞牆腰  
西湖湖上掀篷看  
一夜吹香滿六橋

所性姪家藏東坡看竹圖

銀燭高燒照豔妝  
繁華過眼已相忘  
敲門自愛看修竹  
未必殷勤為海棠

漫題二絕

鈴索無聲玉漏稀  
青綾夜直月侵扉  
五更一覺梅花夢  
催得江南學士歸

屬官分住省郎曹  
省樹年深過屋高  
翰長晝閒來啜茗  
下簾危坐聽松濤

為浪溪題折枝海棠

點綴春風只一枝  
此花猶是半開時  
更令老杜如今見  
便是無情也賦詩

墨竹

兩枝澹澹與濃濃  
垂葉應無霍靡容  
玉立滿身都是雨  
何人能識葛陂龍

高宗御書

君王不受辟寒釵  
永巷泥金進損齋  
欲上太清樓下石

啼鴉落日滿宮槐

陳搏睡圖

陳橋一夜柘袍黃天下都無鼾睡牀  
贏得墜驢閒老子為君眠斷白雲鄉

雪夜訪戴圖

雪夜操舟童僕勞偶然歸去便稱豪  
若為返棹成佳趣轉憶當時不出高

墨荔枝

向來千里騎塵紅  
生色羅襦溼翠濃  
顏色似嫌妃子浣  
蕭然猶有墨君風

山間山水手卷

十年京國看圖畫  
半幅雲烟亦惱儂  
今日身行屏障裏  
却思移住最高峰

武三思雙陸

上陽無子局方闌  
又到乘龍第一盤  
餅餤未來聊樂耳  
郎君好好點籌看

京城雜詠七首

玉堂集日列金羈學士新  
兼祭酒時五百書生簽講遍  
八磚花影最來遲

麗正門當千步街  
九重深處五雲開  
雞人三唱萬官集  
應制須迎學士來

白玉堂前夜合花  
高高綠樹散朱霞  
朝來如見唐人畫  
繫著誰家白鼻騮

龍笙鳳管舞輕盈  
步障遊看花滿城  
行到瓊林春更好



新來進士唱名聲

鰲山宴罷月溶溶  
太液池邊湛露濃  
不用金蓮送歸院  
水晶宮出玉芙蓉

京城走馬聽晨鐘  
我亦宵征僕興慵  
却憶江南春睡美  
小樓欹枕聽邨春

奉詔修書白玉堂  
朝朝騎馬傍宮牆  
牖河東畔垂楊柳  
時有鶯聲似故鄉

逢江易藝芳干賦芳洲

楊柳垂垂拂釣磯  
平沙雨過綠生衣  
王孫鬪草歸來晚  
撲漉鴛鴦帶水飛

東山春景

春光澹澹日遲遲  
正是名園撲蝶時  
却憶小橋流水過  
東山春色在桃枝

蒲萄

宛馬西來貢帝鄉  
驪珠顆顆露凝光  
只今移植江南地  
蔓引龍鬚百尺長

題山莊所藏東坡畫古木圖

眉山昔日生三蘇一山草木為之枯後來筆端挾春腴  
却令生意回枯株樹經公筆無老醜天以春工付公手  
誰云輩行龍眠翁奚必法嗣洋州守山莊劉氏富清玩  
家有蘇公舊揮翰恍驚溼蘚粘怪石慣見倒根生斷岸  
涪翁對此煮春茶為公梢上挂長蛇燈窓細讀假山記  
秀氣終屬眉山家

春閨怨

東風園林花草香芳閨寂莫春晝長佳人獨守情默默  
銀牀錦被閒鴛鴦終朝倦繡拈針蕭怕向花前聽鴛語  
喚回舊事千萬端杏臉蛾眉淚如雨玉郎去年辭家時  
綠楊紅杏嬌春暉綠楊紅杏色如舊悵望玉郎猶未歸  
一春魚雁音書絕雪膚消瘦千腸結斷腸獨立幾黃昏  
那更青山苦啼鴉

和李溉之舞姬脫鞵吟

宮袍繡蹙金花綺紅綃緊襯雙鸞尾盈盈慢服舞腰輕

綵雲飛處香風起藕絲掣斷春雲鬆瑞蓮雙結竝頭紅  
天天曲曲玉彎卷翠鳬飛去天欲輓玉階秀出蘭筍長  
瓊沙迸出蘆芽淺徘徊困倚東風力溼砌香雲墜無跡  
無限嬌羞不自持君王喚起扶花立

贈畫工黎仲瑾

號碧山

吾聞萇弘之忠裂金石精氣千年化為碧人生賴有方  
寸妙萬變神奇從此出又聞西方梵僧名法能令兩  
眼碧色晶熒熒有時肘後灑墨汁纖穠疎秀皆成形碧

山畫欲入神品表裏神光碧瞳炯浮嵐暖翠山不受盡  
付晴窻落泓影碧山學士今為誰玉堂茆舍各有時煩  
君添我山下屋更看白雲相陸離

題紫微老人大字歌

紫微老人射生手挽强竟取黃金斗驃騎營中拜驍勇  
鳳凰池上稱耆舊時平腕力無所施筋力猶能學顏柳  
縱橫戎略結構體殺活兵機屈伸肘山莊劉氏得最多  
當日檐榆駐應久高樓大扁曰明遠况有愛山并尚友

我來後公五十年主人酌我樓中酒平田野水鳬雁集  
重岡覆嶺蛟龍走登高欲賦乏佳興忽覩台躔照窓牖  
家藏有此希世珍取酒當為主人壽想當洗硯發筆時  
羽簾生風劒龍吼焉知今人正傳玩名與麒麟同不朽  
嶠南鼪鼯十五秋老將如今安得有鄂公九原如可作  
養壽清商為公奏

示姪

吾宗孫子多好學爭持卷軸求余詩嗟余膏馥有幾許

况復老懶惟其時子年弱冠氣方銳立志要與青雲期  
冀馬生駒汗血器越女墮地瓊瑤姿固知美質故應爾  
所貴論道隆師資牧之涉世晚自誤冬至作詩鐫阿宜  
初陽萌動慎培養萬木一本含春滋

道吳山

道吳山頭目龍卧疊嶂重岡深紫邏靈湫瀑布千丈長  
古寺神杉十圍大崇祠坎坎風雨來樵徑丁丁鴻雁過  
郡人夜望北斗魁下有突兀青蓮座



# 大圍山

大圍山高高幾許絕頂嵯峨戴林塢石隙花開自春夏  
地鑪僧擁無寒暑清流白鵬滌毛距綠樹黃熊引筋膂  
山腰日午嬰兒啼知有雷公出行雨

## 題捕魚圖

太湖三萬六千頃靈槎倒壓青天影大魚吹浪高如山  
小魚卷鬣為龍盤羣魚聯腴伐桴鼓勢同三軍戰強虜  
長網大罟三百尺攔截中流若環堵吳王宮中宴未闌

銀絲斫膾飛龍鸞大官八珍奉公子猩猩頰脣鯉魚尾  
洞庭木落天南秋黃蘆滿天飛白鷗江頭吹笛喚漁舟  
與君大醉岳陽樓

大明殿早朝

扶搖萬里上青霄鳳闕龍池步步瑤駝背負琛金絡索  
象身備駕玉逍遙衣冠俯伏傳呼嶽干羽低回看舞韶  
湖海布衣瞻盛事他時田野夢天朝

郊天禮成應制

紫壇黃幄夜無風  
牲璧初陳月正中  
瑞靄霏微成五色  
神光烜赫映重瞳  
千官屏息瞻天表  
萬國關心在聖躬  
清曉慶雲高捧日  
簫韶前導駕還宮

敗筆

秋拈秃筆似愚慵  
曾為雲烟埽墨松  
脫穎荒涼空憶兔  
舊腰消瘦久如蜂  
小臣奏事冠初免  
敗將降闕甲不重  
老矣此心無可用  
少年豪氣為誰雄

歐陽公牡丹詩


盛遊西洛方年少晚樂漁樵號醉翁白首歸來玉堂署  
君王殿後見鞶紅



元詩選初集卷三十三

謹案第二頁前五行錫喇鄂爾多舊作失刺軒耳  
朶今改後倣此 二頁前八行咱馬奶子舊作  
灑馬嬾子今改 三頁後二行錫巴爾圖舊作  
失八兒禿今改 二十四頁前二行錫勒舊作  
斜烈今改後倣此 二十七頁後三行阿恰齊  
舊作阿察赤今改





總校官候補中書臣吳紹潔  
校對官編修臣馬啟泰  
謄錄監生臣孫大森